

NATIONAAL ARCHIEF 'S-GRAVENHAGE

HANDSCHRIFTEN DERDE AFDELING

TOEGANGSNUMMER 3.22.01.01

INVENTARISNUMMER 1113

AUTHENTIEKE AFSCHRIFTEN DOOR DE  
RIJKSARCHIVARIS TE GENT VAN EEN ALDAAR  
BERUSTENDE AKTE VAN TRANSPORT  
GEPASSEERD VOOR HET GERECHT VAN HEUSDEN  
VAN EEN HUIS IN DE POTTERSTRAAT ALDAAR

d.d. 1422

EN VAN DE DAARBIJ BEHORENDE  
RETROACTE VAN 1418

BEWERKING DOOR

ANTHONIUS VAN DER TUIJN

TE RHOON

Voor eventuele vragen, opmerkingen en verbeteringen ([anthonius@alice.nl](mailto:anthonius@alice.nl)).

Als u gegevens uit deze bewerking gebruikt voor genealogische of historische doeleinden, dient een verwijzing naar deze bewerking vermeld te worden. Bij gebruikmaking van gegevens uit deze bewerking ten behoeve van publicaties, in welke vorm dan ook, moet een adequate bronvermelding naar deze bewerking worden vermeld.

### **Archives de l'état dépot de Gand.**

Wij Hack van Outhesden Aernts soen ende Aernt Brijs scepen in Heusden tughen onder onse segele dat Mechtelt, Jan Luben wijf was ende Liisbet haer suster Pouwels Dircs soens dochteren met haren gecoren momber opdroeghen joffrouwe Saelmon Robbrechts wiif was van Dronghelen, een huijs metter hofstat liggende inden banne van Heusden aen die Potterstrate tusschen Mathiis Jan Paesdachs soen aen deen side ende Goderts erfgenamen van Drongelen aen dander zide, streckende vander straten ter stat erve toe. Ende alle alsulke brieven ende vorwaerden alsoe daer of siin ende vertegen daer op tot joffrouwe Saelmons behoef voersz. alsoe hem gheen recht daer aen te behouden ende gheloefden hoer dat voersz. huijs metter hofstat te waren, jaer en dach als een eijgen erve ende een volboden ende voorcommer af te doen die daer op is of comen mach van hoerre wegen dien si metten recht sculdich siin af te doen, uutgenomen vier pont tsiaers die daer op ligghen met recht te ciinsse. Mede is ons scepenen voersz. condich dat wi enen scepenen brief gesien hebben sprekende van woerde te woerde als hier na ghescreven staet: Wij Robbrecht van Doerne Spierings soen ende Ghijsbrecht van Ghemert scepen in Huesden tughen onder onse segele dat Dirc Pouwels Dircs soens soen Jorifaes Roelof Huben soens soen als momber Delijanen siins wiifs, Aernt Matthiis soen als momber Merswinen siins wiifs ende Bouden Jans soen als momber Jannen siins wiifs vertegen op een huijs metter hofstat liggende inden banne van Huesden tusschen Mathiis Jan Paesdachs soen aen deen side ende Godert van Drongelen aen dander side. Ende opt tweedeel van enen stuccke lants liggende inden banne van Outhuesden geheeten den Coecampe in die helfte ter Rutenwaert tusschen den Riingrave aen deen side ende Jorifaes Dirc ende Bouden voirsz. aen dander side. Ende op alle alsulke brieve ende vorwaerden alsoe daer af siin tot behoef Liisbetten Pouwels Dircs soens dochter alsoe hem gheen recht daer aen te behouden. Ende gheloefden hoer hadden si eenigen commer daerop gemaect met hande of met monde, dat si hoerdren commer af souden doen. Ende hiermede ghieden ende kenden si dat in gescift ende gedeijlt siin van sulken versterf alsoe hem aen bestorven is van Pouwels Dircs soen ende Heijlwigen sinen wive. Mede is ons scepenen voersz. condich dat wi enen scepenen brief gesien hebben sprekende van woerde te woerde als hier na gescreven staet: Wij Brien van Wiic ende Peter die Vosse scepen in Huesden tughen onder segele dat Jan Luben soen verteech op alle alsulke versterf als hem aenbestorven is van Pouwels Dircs soen sinen zweer ende van Heijlwigen Pouwels Dircs soens wiif was siinre zweghers tot behoef Liisbetten Pouwels Dircs soens dochter alsoe hem gheen recht daer aen te behouden. Ende gheloefde hoer hadde hi eenegen commer daerop gemaect met hande of met monde, dat hi hoer dien commer af soude doen. Gegeven int jaer ons heren viertien hondert ende achtiene opten vierden dach in junio. Gegeven in tjaer ons heeren veertienhondert ende achtiene tsaterdages na Sente Andries dach. Mede is ons scepenen voersz. condich dat wi enen scepenen brief gesien hebben sprekende van woerde te woerde als hier na gescreven staet: Wij Robbrecht van Doerne Spierings soen ende Ghijsbrecht van Ghemert scepen in Huesden tueghen onder onse segele dat Liisbet Pouwels Dircs soens dochter met horen gecoren momber verteech op die helfte van enen huijs metter hofstat, leggende inden banne van Huesden tusschen Mathiis Jan Paesdachs soen aen deen side ende Godert van Drongelen aen dander. Ende op tstededeel van enen stuccke lants liggende inden banne van Outhuesden gheheiten den Coecampe in die helfte ten Rutenwaert tusschen den Riingrave aen deen side ende Jorefaes Roelof Huben soenssoen, Dirc Pouwels Dircs soens soen ende Boijden Jans soen aen dander side. Ende op alle alsulke brieve ende vorwaerden alsoe daer af siin tot behoef Mechtelden die wiif was Jan Luben soens alsoe hoer geen recht daer aen te behouden ende gheloefde hoer hadde si eenegen commer daer op gemaect met hande of met monde, dat si dien commer af soude doen. Mede is ons scepenen voersz. condich dat wi enen scepenen brief gesien hebben die gemaect waert int jaer ons heren doe men screef viertienhondert ende achtiene op Sente Lucien avont daer Dirc Pouwels Dircs soens soen, Jorifaes Roelof Huben soens soen als momber Delijaenen siins wiijfs, Aernt Matthiis als momber Merswinen siins wiifs ende Bouden Jans soen als momber Jannen siins wiifs in vertegen hebben op die helfte van enen huijze metter hofstat liggende inden banne van Huesden tusschen Mathiis Jan Paesdachs soen aen deen side ende Godert van Drongelen aen dander side. Ende op tstededeel van enen stuccke lants liggende inden banne van Outhuesden gheheiten den Coecampe in die helfte ter Ruten waert tusschen den Riingrave aen deen side ende Jorifaes Dirc ende Bouden vorsz. aen dander side. Ende op alle

alsulke brieven ende vorwaerden also daer af siin tot behoef Liisbetten Pouwels Dircs soens dochter also hem gheen recht daer aen te behouden ende gheloefden hoer hadden si eeniger commer daerop gemaect met hande of met monde, dat si hoer dien commer af soudē doen. Noch is ons scepenen voorsz. condich dat wi ene scepenen brief gesien hebben sprekende van woerde te woerde als hier na gescreven staet; Wij Brien van Wiic ende Peter die Vosse scepen in Huesden tughen onder onse segele dat Jan Luben soen verteech op alle alsulke versterf also hem aen bestaen is van Pouwels Dirc soen sinen zweer ende van Heijlwigen Pouwels Dircs soens wiif was siinre zwegers tot behoef Liisbetten Pouwels Dircs soens dochter also hem geen recht daer aen te behouden ende gheloefde haer, hadde hi enegen commer daer op gemaect met hande of met monde dat hi hoer dien commer af soude doen. Gegeven int jaer ons heren viertienhondert ende achtiene opten vierden dach in junio. Gegeven int jaer ons heren viertienhondert ende achtiene tsaterdaghes na Sente Lucien dach.

Gegeven int jaer ons heren viertienhondert ende twe ende twintich opten neghen ende twintichsten dach in aprille.

**In originali op perkament.**

(Zegels der twee scepenen uithangende op strookjes perkament)

Archief der abdij Bandeloo.

Charters der proostdij Mariënvroon en Mariendonck.

Uitgegeven voor woordelijk gelijkkluidend afschrijf van een schepenbrief van Heusden, gepasseerd door de schepenbank van Heusden in Nederland den 29 april 1422, in originali aanwezig in het depot der Staatsarchieven van het koninkrijk België te Gent.

Nr. 521.

Gent den 15 december 1927.

De Rijksarchivaris te Gent.

Was getekend: C. van den (Hande).